

脉

訣

彙

辨

脉訣彙辨卷三

趙郡辰山李延是期叔父輯纂

永嘉 張延庚叔戶父纂附

小序

叔和脉經似無遺用乃長短二脉缺而不載牢  
革二脉混而不分未盡脉旨也王常闢偽訣七  
表八裏之陋是矣而復增長數二脉爲九表短  
細二脉爲十裏又何說哉脉之動靜固陰陽所  
生其變化不皆爲名數所限也是編二十八脉  
悉皆卽義辨形義極理要至於主病畧同者則

不加詮釋引而申之在於擇者

浮脉

體象 浮在皮毛如水漂木舉之有餘按之不足

浮之爲義如木之浮水面也其脉應於皮毛故輕手可得如水中漂木雖按之使沉亦將隨手而起

主病

浮脉爲陽其病在表左手浮者頭痛目眩浮

在左關腹脹不寧左尺得浮膀胱風熱右寸浮者風邪喘嗽浮在右關中滿不食右尺得浮大便難

出

六府屬陽其應在表故浮主表病也高巖之上惟

風可到雜亂其清陽之氣痛眩之自來肝爲風木  
之藏風勝則木張而筋脹勝腕受風風勝熱淫津  
液自燥故令小便秘澀肺受風邪清肅之令不行  
氣高而喘嗽風木乘脾中氣憊而食減腎家通主  
二便風客下焦大府燥而不快

兼脉 無力表虛有力表實浮緊風寒浮緩風濕浮  
數風熱浮遲風虛浮虛暑憊浮扎失血浮洪虛熱  
浮濡陰虛浮瀼血傷浮鉅氣病浮弦痰飲浮滑痰  
熱浮數不熱瘡疽之兆

脉非一端必有兼見之象或外而偏於六淫或內

而偏於七情則脉將雜至然後揆其輕重以別病  
情如浮脉當卽見於皮毛而取之無力此氣不能  
應表虛之象如力來太過表實何疑緊則緊歛寒  
之性也風中有寒緩則緩惰濕之性也風中有濕  
數乃過於鼓動爲風熱相搏遲乃徐徐而至爲風  
虛無力暑傷乎氣氣泄則脉虛榮行脉中血失則  
脉芤一則浮取之而如無氣外泄也一則浮取之  
而則有血中脫也炎炎上蒸火之象也但浮則有  
表無裏故曰虛熱衰薄之甚若無其下故曰陰虛  
脉浮而濇乃肺脉之應於秋者若加以身熱則火

盛金衰血日以損浮瀆而短乃肺家之本原其象過短是真氣不能會於寸口以成權衡氣將竭矣水飲應沉而言浮者上焦陽不能運隨着停留若浮而滑者則非弦歛不鼓之象寒當化熱飲當成痰浮數理應發熱其不發熱而反惡寒者若有一定不移之痛處瘡疽之兆矣

按浮脉法天。輕清在上之象。在卦爲乾。在時爲秋。在人爲肺。素問玉機真藏論曰。其氣來毛而中央。堅兩旁虛。此謂太過。病在外。其氣來毛而微。此謂不及。病在中。又曰。太過則氣逆而背痛。不及則喘。

少氣而咳上氣見血素問平人氣象論曰平肺脉來厭厭聶聶如落榆莢曰肺平病肺脉來不上不下如循雞羽曰肺病死肺脉來如物之浮如風吹毛曰肺死然肺掌秋金天地之氣至秋而降况金性重而下沉何以與浮脉相應耶不知肺金雖沉而所王者實陽氣也乃自清濁肇分天以氣運於外而攝水地以形居中而浮於水者也是氣也卽天之謂也人形象天故肺主氣外應皮毛陽爲外衛非皮毛乎此天之象也具包裹骨肉府藏於中此地之象也血行於皮裏肉腠晝夜周流無端此

此水之象也。合三者而觀，非水浮地，天攝水，地懸於中乎？所以聖人作易，取金爲氣之象，蓋大氣至清至剛，至健屬乎金者也。非至剛不能攝此水，非至健不能運行無息以舉地之重，故以氣屬金。厥有旨哉！王叔和云：舉之有餘，按之不足，最合浮脉象天之義。黎氏以爲如捻葱葉，則混於孔脉矣。崔氏云：有表無裏，有上無下，則脫然無根，又混於散脉矣。僞訣云：尋之如太過，是中候盛滿，與浮之名義有何干涉乎？須知浮而盛大爲洪，浮而軟大爲虛，浮而柔細爲濡，浮弦孔爲革，浮而無根爲散，浮



而中空爲孔毫釐疑似相去千里矣

沉脉 陰

體象

沉行筋骨如水投石按之有餘舉之不足

沉之爲義如石之沉水底也其脉近在筋骨非重按不可得有深深下沉之勢

主病 沉脉爲陰其病在裏左寸沉者心寒作痛沉在左關氣不得申左尺得沉精寒血結右寸沉者痰停水蓄沉在右關胃寒中滿右尺得沉腰痛病水

五藏屬陰其應在裏故沉主裏病也心失煦燠之權爲寒所制則痛木失調達之性爲寒所遏則結

腎主精血若有陰而無陽譬之水寒則凝肺位高  
脉浮布一身之陰陽者也倘使倒置則真氣不運  
而或痰或水爲害脾胃喜溫不浮不沉是其候也  
脉形偏於近下則土位無母何以運行三焦熟腐  
五穀中滿吞酸之證至矣腰臍以下皆腎主之右  
腎真火所寓而元陽猶冷則精血衰敗腰脚因之  
不利病水者腎居下焦統攝陰液右爲相火火既  
衰熄則陰寒之水不得宣洩

兼脉 無力裏虛有力裏實沉遲利冷沉數內熱沉  
滑痰飲沉瀝血結沉弱虛衰沉牢堅積沉緊冷疼

沉緩寒熱

無力裏原非實但氣不申有力有物在裏沉爲在裏而復遲虛寒可必沉爲在裏而加數伏熱何疑滑則陰凝之象也見於沉分宜有痰飲滿則血少之徵也按而後得應爲積血沉爲陰弱爲虛沉弱必主陰虛沉爲裏牢爲積沉牢定爲痼冷沉而緊則寒爲歛實故冷痛也沉而緩則陽不健行故濕成焉

按沉脉法地重濁在下之象在卦爲坎在時爲冬在人爲腎素問玉機真藏論曰黃帝曰冬脉如營

何如而營岐伯對曰冬脉腎也北方之水也萬物所以含藏其氣來沉以栗故曰營其氣如彈石者此爲太過病在外令人解體脊脉痛而少氣不欲言其虛如數者此謂不及病在中令人心懸如饑脛中清春中痛小腹痛小便黃赤素問平人氣象論曰平腎脉來喘喘累累如鈞按之而堅曰腎平冬以胃氣爲本病腎脉來如引葛按之益堅曰腎病死腎脉來發如奪索辟辟如彈石曰腎死楊氏曰如綿裹砂內剛外柔審度名義頗不相戾僞訣云緩度三關狀如爛綿則是弱脉而非沉脉矣若

緩度三關尤不可曉須知沉而細要爲弱脉沉而  
弦勁爲牢脉沉而着骨爲伏脉剛柔淺深之間宜  
熟玩而深思也

腎之爲藏配坎應冬萬物蟄藏陽氣下潛烈爲雪  
霜故脉主沉陰而居裏若悞與之汗則如飛蛾出  
而見湯矣此叔和入理之微言後世之司南也

遲脉 陰

體象

遲脉屬陰象爲不及往來遲慢三至一息

遲之爲義遲滯而不能中和也脉以一息四至爲  
和平遲則一息三至氣不振發行不如度故曰屬  
陰

主病 遲脉主藏其病爲寒左寸遲者心痛停凝遲

在左關藏結攣筋左尺得遲腎虛便濁女子不月  
右寸遲者肺寒痰積遲在右關胃傷冷物右尺得  
遲藏寒泄瀉小腹冷痛

五藏爲陰遲亦爲陰是以主藏陰性多滯故陰寒

之證脉必見遲也正如太陽隸於南陸則火度而  
行數隸於北陸則水度而行遲卽此可以徵陰陽  
遲速之故矣難經九難曰遲者藏也又曰遲則爲  
寒傷寒論亦曰遲爲在藏以陽氣伏潛不能健行  
故至數遲耳其所主病與沉脉大約相同但沉脉  
之病爲陰逆而陽鬱遲脉之病爲陰盛而陽鬱沉  
則或須攻散遲則未有不大大行溫補者也

兼脉 有力冷痛無力虛寒浮遲表冷沉遲裏寒遲  
瀉血少遲緩濕寒

遲而有力有壅實不通利之意痛可想見遲云陽



伏而又無力豈非虛寒浮則表之候也沉則裏之候也兼遲而爲寒可必血得熱則行濕得熱則散遲乃寒象何以養榮而燥濕乎

按遲脉之象上中下候皆至數緩慢僞訣云重手乃得是沉脉而非遲脉矣又云狀且難是滯脉而非遲脉矣一息三至甚爲分明而云隱隱是微脉而非遲脉矣遲而不流利則爲滯脉遲而有歇止則爲結脉遲而浮大且緩則爲虛脉至於緩脉絕不相類夫緩以寬縱得名遲以至數不及爲義故緩脉四至寬緩和平遲脉三至遲滯不前然則二

脉通別又安可瀕哉以李瀕河之通達亦云小缺  
於遲作緩持以至數論緩脉是千慮之一失也叔  
和曰一呼一至曰離經二呼一至曰奪精三呼一  
至曰死四呼一至曰命絕此損之脉也一損損於  
皮二損損於血脉三損損於肌肉四損損於筋五  
損損於骨是知脉之至數愈遲此時正氣已無陰  
寒益甚不過燼燈之餘焰有不轉眼銷亡者乎

數脉 陽

體象 數脉屬陽象爲太過一息六至往來越度

數之爲義躁急而不能中和也一呼脉再動氣行三寸一吸脉再動氣行三寸呼吸定息氣行六寸一晝一夜凡一萬三千五百息當五十周於身脉行八百一十丈此經脉周流恒常之揆度若一息六至豈非越其常度耶氣行速疾故曰屬陽

主病 數脉主病其病爲熱左寸數者頭痛上熱舌瘡煩渴數在左關目淚耳鳴左顧發赤左尺得數消渴不止小便黃赤右寸數者欬嗽吐血喉腥嗌

痛數在右關脾熱口臭胃反嘔逆右尺得數大便  
秘澀遺濁淋痿

火性急速故陽盛之證脉來必數六府爲陽數亦  
爲陽是以王府難經九難曰數者府也又曰數則  
爲熱傷寒論亦曰數爲在府此以遲數分陰陽故  
卽以配藏府亦不過言其大概耳至若錯綜互見  
在府有遲在藏有數在表有遲在裏有數又安可  
以藏府二字拘定耶火亢上焦清陽擾亂而頭痛  
舌乃心之苗熱則生瘡而煩渴肝開竅於目熱甚  
而淚迫於外耳鳴者火逞其炎上之虐耳左額

之應也熱乃赤色見焉天一之原陰水用事熱則陰不勝陽澤池之水不能直達於舌底故渴而善飲漫如膏油便赤又其小者矣肺屬金而爲嬌藏火其仇譬火來乘金欬嗽之聲也肺火獨熾則咽嗌時覺血腥嚔津則痛乃失血之漸脾胃性雖喜燥若太過則有燥烈之虞胃爲水穀之海熱甚而釀成穢氣食入則吐是有火也腎主五液饑飽勞役及辛熱厚味使火邪伏於血中津液少而大便結矣

兼脉 有力實火無力虛火浮數表熱沉數裏熱

數而有力聚熱所致數而無力熱中兼虛浮脉主  
表沉脉主裏兼數則熱可知

按數脉與遲脉爲一陰一陽諸脉之綱領僞訣立  
七表八裏而獨遺數脉止歌於心藏其過非淺數  
而弦急則爲緊脉數而流利則爲滑脉數而有止  
則爲促脉數而過極則爲疾脉數如豆粒則爲動  
脉非深思不能辨別也叔和云一呼再至曰平三  
至曰離經四至曰奪精五至曰死六至曰命盡乃  
知脉形愈數則受證愈熱肺部見之爲金家賊脉  
秋月逢之爲尅令凶徵

脉之爲道傳而言之其象多端約而言之似不外乎浮沉遲數而已。浮爲病在表沉爲病在裏數則爲病熱遲則爲病寒而又參之以有力無力定其虛實則可以盡脉之變矣。然有一脉而兼見數證有一證而相兼數脉又有陽證似陰陰證似陽與夫至虛有盛候大實有羸狀其毫釐疑似之間消之甚微在發汗吐下之際所繫甚大苟偏執四見則監焉勿詳必須二十八字字字窮研則心貫萬象始而由粗及精終乃從博反約稱曰善診其無愧乎

滑脉

陽中之陰

體象

滑脉替替往來流利盤珠之形荷露之義

滑者往來流利而不瀉滯也故如盤中之走珠荷葉之承露形容其旋轉輕脫之狀

主病 左寸滑者心經痰熱滑在左關頭目爲患左尺得滑重痛尿赤右寸滑者痰飲嘔逆滑在右關宿食不化右尺得滑溺血經鬱

滑脉勢不安定鼓蕩流利似近於陽故曰陽中之陰不腐不化之物象亦如之故主痰液有物之類爲多心王高拱百邪莫犯如使痰入胞絡未免震



降東風生於春病在肝目者肝之竅肝風內鼓則  
熱生邪害空竅腎氣通於前陰膀胱火迫故莖痛  
尿赤肺有客邪積爲痰飲則氣不宣揚而成嘔逆  
食滯於胃脉必壅盛滑則相近於緊故脾胃見之  
知其宿食石火部滑爲太過血受火迫而隨溺  
出經帶者非停痰則氣滯血壅相與爲病耳

兼脉 浮滑風痰沉滑痰食滑數痰火滑短氣塞滑  
而浮大尿則陰痛滑而浮散中風難緩滑而冲和  
娠孕可决

鼓動浮越風之象也故滑而浮者兼風沉下結滯

食之微也。故滑而沉者兼食熱則生痰故流利之  
間而至數加以急疾鬱則氣滯故圓轉之際還呈  
短縮浮大者膀胱火熾尿乃作疼浮散者風淫氣  
虛行坐不遂滑伯仁曰三部脉浮沉正等無他病  
而不月者爲有妊也。故滑而冲和此血來養胎之  
兆。夫脉者血之府也。血盛則脉滑故妊脉宜之。  
凡痰飲嘔逆傷食等證皆上中二焦之病以滑爲  
水物兼有之象也。設所吐之物非痰與食是爲嘔  
逆脉必見澀也。溺血經閉或主淋痢者咸內有所  
蓄血積類液瘀凝類痰須以意求耳。

按素問診要經終篇曰滑者陰氣有餘陰氣有餘故多汗身寒偽訣云胃家有寒下焦蓄血臍下如冰與經旨未全違背第不知變通禪家所謂死於句下仲景以翕奄沉三字狀滑脉者翕者合也奄者忽也當脉氣合聚而盛之時奄忽之間卽以沉去摩寫往來流利之狀極爲曲至又曰沉爲純陰翕爲正陽陰陽和合故令脉滑關尺自平此言無病之滑脉也若云陽明脉微沉者當陽部見陰脉則陰氣偏勝而陽不足也少陰脉微滑者當陰部見陽脉則陽偏勝而陰不足也三部九候各自不

同僞訣云按之卽伏不進不退是不分浮滑沉滑  
尺寸之滑矣仲景恐人誤認滑脉爲沉下文又曰  
滑者緊之浮名也則知沉爲翕奄之沉非重取乃  
得一定之沉也而僞訣云按之卽伏與翕奄之沉  
何啻千里云不進不退與滑之象尤爲不合夫血  
盛則脉滑故腎脉宜之氣盛則脉滑故肺脉宜之  
此皆滑中之平脉叔和言關滑胃熱乃指與數相  
似正內經所云諸過者切之之滑也娶之兼浮者  
毗於陽兼沉者毗於陰是以或寒或熱從無定稱  
惟衡之以浮沉辨之以尺寸始無誤耳故善於讀

書則如僞訣胃家有寒諸說亦可通之於經不善  
讀書內經陰氣有餘一語適足以成刻舟求劍之  
弊脉豈易言也哉

瀉脉陰

體象 瀉脉蹇滯如刀刮竹遲細而短三象俱足

瀉者不流利之義素問三部九候篇曰參伍不調者病謂其凝滯而至數不和勻也脉訣以輕刀刮竹爲喻者刀刮竹則阻滯而不滑也通真子以如雨沾沙爲喻者謂雨沾金石則滑而流利雨沾沙土則瀉而不流也時珍以病蠶食葉爲喻者謂其遲慢而艱難也

主病 瀉爲血少亦主精傷左寸瀉者心痛怔忡瀉在左關血虛肋脹左尺得瀉精傷胎漏右寸瀉者

痞氣自汗濇在右關不食而嘔右尺得濇大便艱  
秘腹寒脛冷

中焦取汁變化而赤是謂血壅遏營氣令無所避  
是謂脉兩者同質異名况血爲陰液多則滑利少  
則枯澀勢所然也精也血也皆屬於陰故共主之  
籍以供神明之用者血也血少則不能養心而痛  
作積久而加以驚疑則怔忡至矣肝爲血海血少  
則不能自榮而所部作痛腎傷則精無餘蓄男子  
洩淋婦人血敗胎漏真陽喪矣肺家真氣旣虧胸  
中不能運行則爲痞塞不能衛外而爲固則汗時

自出出則液耗謂之脫液漏而不止衛氣散失四肢厥寒謂之亡陽陽亡液脫故亦主瀉血少則脾陰弱而食減嘔作甚而朝食暮吐暮食朝吐或隨食隨吐胃無餘液血少則津液枯無由下致而大便艱腹寒脛冷皆緣血少不獲隨真陽之氣以運行耳

兼脉 瀉而堅大爲有實熱瀉而虛軟虛火炎灼瀉本血少而再得堅大之形乃邪火熾甚陰不勝陽若僅見虛軟此屬無根之火熏灼耳或因憂鬱或因厚味或因無汗或因妄補氣騰血沸清化爲



濁老痰宿飲膠固雜糅脉道阻澀不能自至亦見  
瀉狀若重取至骨似有力而帶數以意參之於證  
驗之形氣但有熱證當作痼熱可也

按一切世間之物濡潤者則必滑枯槁者則必瀉  
故滑爲痰飲瀉主陰衰理有固然無足辨者肺之  
爲藏氣多血少故右寸見之爲合度之診腎之爲  
藏專司精血故右尺見之爲虛殘之候不問男婦  
凡尺中沉瀉者必艱於嗣正血少精傷之確證也  
故女人懷子而得瀉脉則血不足養胎如無孕而  
得瀉脉將有陰衰髓竭之憂僞訣云指下尋之似

有舉之全無則是微脉而非濇脉矣。叔和謂其  
止復來亦有疵病。蓋濇脉往來遲難有類乎止而  
實非止也。又曰細而遲往來難且散者乃浮分多  
而沉分少有類乎散而實非散也。須知極細極軟  
似有若無爲微脉。浮而且細且裏爲濡脉。沉而且  
細且裏爲弱脉。三者之脉皆指下模糊有似乎濇  
而實有分別也。然一脉濇也更有外邪相襲使氣  
分不利而成滯澀。衛氣散失使陽衰不守而成虛  
澀。腸胃燥渴津液亦亡使血分欲盡而成枯澀。在  
診之者是爲靈通耳。

虛脉陰

體象 虛合四形浮大遲更及乎尋按幾不可見  
虛之爲義中空不足之象專以更而無力得名者  
也

主病 虛主血虛。又主傷暑。左寸虛者心虧驚悸虛  
在左關血不營筋左尺得虛腰膝痠痺右寸虛者  
自汗喘促虛在右關脾寒食滯右尺得虛寒證蜂  
起

脉經曰血虛脉虛而獨不言氣虛者何也氣爲陽  
主浮分。血爲陰主沉分。今浮分大而沉分空故獨

主血虛耳。若夫肺脉見之又主氣怯者肺與乾天合德不浮而沉氣分欲竭之兆也血少則不足以濟心王高拱之權而動見章皇肝爲血海而主筋虛則筋失其養腰者腎之府也膝者骨之屈伸開闔處也虛則不爲我用陽氣虛則不能衛外而自汗真氣虛而喘促者蓋由機緘不相接續食滯者脾胃虛寒乾健坤順兩失其職真火衰而諸證畢集非轉陽和之令事何克濟乎

虛脉又主傷暑者蓋暑爲陽邪其勢足以燔石流金于於脾則吐利于於心則煩心併於上則頭重

併於下則便秘其見於脉也不洪數而反見虛者  
因暑性炎熱使人表氣易泄故脉必虛耳

按脉經曰遲大而爽按之豁豁然空此言最爲合  
義雖不言浮字而曰按之豁然空則浮字之義已  
包含矣崔紫虛以爲形大力薄其虛可知但欠遲  
字之義耳偽訣云尋之不足舉之有餘是浮脉而  
非虛脉矣浮以有力得名虛以無力取象有餘二  
字安可施之虛脉乎楊仁齋曰狀爲柳絮散慢而  
遲滑伯仁曰散大而爽二家之言俱是散脉而非  
虛脉矣夫虛脉按之雖爽猶可見也散脉按之絕

無不可見也虛之異於濡者虛則遲大而無力濡則細小而無力也虛之異於芤者虛則愈按而愈軟芤則重按而仍見也夫虛脉兼遲遲爲寒象大凡證之虛極者必挾寒理勢然也故虛脉行於指下則益火之原以消陰翳更有浮取之而且大且數重按之而豁然如無此名內真寒而外假熱古人以附子理中湯米冷與服治以內真熱而外假寒之劑也

實脉 陽

體象 實脉有力長大而堅應指愊愊三候皆然  
實爲邪盛有餘之象既大而且兼長既長大而且  
有力既長大有力而且浮中沉三候皆然則諸陽  
之象莫不畢備

主病 血實脉實。火熱壅結左寸實者舌強氣壅口  
瘡咽痛實在左關肝火脇痛左尺得實便秘腹疼  
右寸實者嘔逆咽痛喘嗽氣壅實在右關伏陽蒸  
內中滿氣滯右尺得實臍痛便難相火亢逆  
脉實必有大邪大熱大積大聚故脉經云血實脉

實又曰氣來實強是謂太過由是測之皆主實熱其所主病大約與數脉相類而實則過之以其蘊蓄之深也

按素問大奇論曰肝滿腎滿肺滿皆實卽爲腫如肝雍兩肱滿卧則驚不得小便腎雍肱下至少腹滿脰有大小髀胫大跛易偏枯肺之雍喘而兩肱滿之類皆實脉也實主邪氣有餘易於體象所以叔和有尺實則小便難之說乃僞訣謬以尺實爲小便不禁何適相反又妄謂如繩應指來則是緊脉之形而非實脉之象矣夫緊脉之與實脉難相



類而實相懸但緊脉弦急如切繩而左右彈人手實脉則且大且長三候皆有力也緊脉者熱爲寒束故其象絀急而不寬舒實脉者邪爲火迫故其象堅滿而不和柔以證合之以理察之便昭昭於心目之間又按張潔古惑於僞訣實主虛寒之說而遂以薑附施治此甚不可爲訓或實脉而兼緊者庶乎相當苟非緊象而大溫之劑施於大熱之人其不立斃者幾希以潔古之智當必是兼緊之治法無疑耳夫陰陽對耦不可稍偏陽氣過旺不敢有自焚之虞今世宗丹溪者以爲陽常有餘喜

用寒涼乃致殺人如麻恬不之怪又有有激之論  
爲劉朱之言不息則軒岐之澤不彰三吳兩浙翕  
然成風以薑附爲茶飯其流毒更不可言執一舍  
一禍害相尋可勝嘆哉

長脉 陽

體象 長脉迢迢首尾俱端直上直下如循長竿

首尾相稱往來端直也

主病 長主有餘氣逆火盛左寸長者君火為病長  
在左關木實之殃左尺見長奔豚冲競右寸長者  
滿逆為定長在右關土鬱脹悶右尺見長相火專  
冷

長脉與數脉實脉皆相類而長脉應肝肝屬木而  
生火如上諸證莫非東方熾甚助南離之焰為中  
州之仇須以平木為急耳

按素問平人氣象論曰肝脉來軟弱招招揭長竿末稍曰肝平肝脉來盈實而滑如循長竿曰肝病故知長而和緩卽合春生之氣而爲健旺之徵長而硬滿卽屬火亢之形而爲疾病之應長脉在時爲春在卦爲震在人爲肝肝主春生之令天地之氣至此而發舒素問脉要精微論曰長則氣治李月池曰心脉長者神強氣壯腎脉長者蒂固根深皆言平脉也如上文主病云云皆言病脉也舊說過於本位名爲長脉久久審度而知其必不然也寸而上過則爲溢脉寸而下過卽爲關脉關而上

過卽屬寸脉關而下過卽屬尺脉尺而上過卽屬  
關脉尺而下過卽爲覆脉由是察之然則過於本  
位理之所必無而義之所不合也惟其狀如長竿  
則直上直下首尾相應非若他脉之上下參差首  
尾不勻者也凡實牢弦緊四脉皆兼長脉故古人  
稱長主有餘之疾非無本之說也

短脉陰

體象 短脉濇小首尾俱俯中間突起不能滿部

短之爲象兩頭沉下而中間獨浮也

主病 短主不及爲氣虛證左寸短者心神不定短在左關肝氣有傷左尺得短少腹必疼右寸短者肺虛頭痛短在右關膈間爲殃右尺得短真火不隆

素問脉要精微論曰短則氣病蓋以氣屬陽主乎充沛若短脉獨見氣衰之確兆也然肺爲主氣之藏徧與短脉相應則又何以說也素問玉機真藏

論謂肺之平脉厭厭聶聶如落榆莢則短中自有和緩之象氣仍治也若短而沉且濇而謂氣不病可乎。

按一息不運則機緘窮一毫不續則穹壤判僞訣以短脉爲中間有兩頭無爲不及本位據其說則斷絕不通矣夫脉以貫通爲義若使上不貫通則爲陽絕下不貫通則爲陰絕俱爲必死之脉豈有一見短脉遂致危亡之理乎戴同父亦悟及於此而云短脉只常見於尺寸若關中見短是上不通寸下不通尺爲陰陽絕脉而必死同父之說極爲

有見然尺與寸可短依然落於陰絕陽絕矣殊不知短脉非兩頭斷絕也特兩頭俯而沉下中間突而浮起仍自貫通者也叔和云應指而迴不能滿部亦非短脉之合論也時珍曰長脉屬肝宜於春短脉屬肺宜於秋但診肺肝則長短自見故知非其時非其部卽爲病脉也凡得短脉必主氣血虛損僞訣指爲氣壅者何也潔古至欲以巴豆神藥治之良不可解



洪脉 陽

體象

洪脉極大狀如洪水來盛去衰滔滔滿指

洪脉卽大脉也如洪水之洪喻其盛滿之象也

主病

洪爲盛滿氣壅火亢左寸洪者心煩舌破洪

在左關肝脉太過左尺得洪水枯便難右寸洪者

胸滿氣逆洪在右關脾土脹熱右天得洪龍火燔

灼

按洪脉在卦爲離在時爲夏在人爲心時當朱夏

天地之氣酣滿暢遂脉者得氣之先故應之以洪

洪者大也以水喻也又曰鉤者以木喻也夏木繁

滋枝葉敷布重而下垂故如鈎也鈎卽是洪名異  
實同素問玉機真藏論以洪脉爲來盛去衰頗有  
微旨大抵洪脉只是根脚濶大却非堅硬若使大  
而堅硬則爲實脉而非洪脉矣素問脉要精微論  
曰大則病進亦以其氣方張也又曰夏脉如鈎何  
如而鈎岐伯曰夏脉心也南方火也萬物所以盛  
長也其氣來盛去衰故曰鈎反此者病黃帝曰何  
如而反岐伯曰其氣來盛去亦盛此謂太過病在  
外其氣來不盛去反盛此謂不及病在中太過則  
令人身熱而膚痛爲浸淫不及則令人煩心上也

欬唾下爲氣泄叔和云夏脉洪大而散名曰平  
反得沉濡而滑者是腎之乘心水之尅火爲賊邪  
死不治反得大而緩者是脾之乘心子之扶母爲  
實邪雖病自愈反得弦細而長者是肝之乘心母  
之歸子爲虛邪雖病易治反得浮濇而短者是肺  
之乘心金之陵火爲微邪雖病卽瘥凡失血下利  
久嗽久病之人俱忌洪脉素問三部九候論曰形  
瘦脉大多氣者死可見形證不與脉相合者均非  
吉兆

微脉陰

體象 微脉極細而又極軟似有若無欲絕非絕  
微之爲言近於無也仲景曰瞥瞥如羹上肥狀其  
軟而無力也縈縈如蠶絲狀其細而難見也古人  
似有若無欲絕非絕八字真爲微脉傳神

主病 微脉糢糊氣血大衰左寸微者心虛憂惕微  
在左關寒鬱氣乏左尺得微髓竭精枯右寸微者  
中寒少氣微在右關胃寒氣脹右尺得微陽衰寒  
極

按筭數者以十微爲一忽十忽爲一絲十絲爲一

毫十毫爲一釐由是推之則一釐之少分而爲萬方始名微則微之渺小難見可知世俗未察微脉之義每見脉之細者輒以微細二字並稱是何其言之不審耶輕取之而如無故曰陽氣衰重按之而欲絕故曰陰氣竭若細脉則稍稍較大顯明而易見非如微脉之模糊而難見也雖其證所患畧同而其形亦不可不辨時珍云微主久虛血弱之病陽微則惡寒陰微則發熱自非峻補難可回春而僞訣所云漩之敗血小腸居何以置之微脉乎若下兼他象雖微而來去未亂猶可圖存于百一

卒病得之。猶或可生者。謂邪氣不至深重也。長病得之多。不可救者。正氣將次絕滅。草木之味難藉以支持耳。

在傷寒證。惟少陰有微脉。他經則無。其太陽膀胱爲少陰之府。纔見脉微惡寒。仲景早從少陰施治。而用附子乾薑矣。蓋脉微惡寒。正陽氣衰微所至。詩云。彼月而微。此日而微。今此下民亦孔之哀。在天象之陽。且不可微。然則人身之陽。顧可微哉。腎中旣已陰盛陽微。寒自内生。復加外寒。斬關直入。其人頃刻云亡。故仲景以爲卒病。而用辛熱以回。

一錢真陽於重泉之下也。卒中寒者陽微陰盛最爲危急。素問調經論篇曰陰盛生內寒。因厥氣上逆寒氣積於胸中而不泄則溫氣去寒獨留留則血凝。血凝則脉不通。其脉盛大以瀉故中寒。夫既言陰盛生內寒矣。又言故中寒者。豈非內寒先生外寒內中之耶。經既言血脉不通矣。又言其脉盛大以瀉者。豈非以外寒中故脉盛大血脉閉故脉瀉耶。此中深有所疑。請申明之一者。人身衛外之陽最固。太陽衛身之背。陽明衛身之前。少陽衛身之兩側。今不由三陽而直中少陰。豈真從天而下。

蓋厥氣上逆積於胸中則胃寒胃寒則口食寒物  
鼻吸寒氣皆得入胃腎者胃之關也外寒斬關直  
入少陰腎藏故曰中寒也此經隱而未言者也一  
者其脉盛大以瀋雖曰中寒尚非卒病卒病中寒  
其脉必微蓋經統言傷寒中寒之脉故曰盛大以  
瀋仲景以傷寒爲熱病中寒爲寒病分別言之傷  
寒之脉大都以大浮數動滑爲陽沉瀋弱弦微爲  
陰陽病而見陰脉且主死况陰病卒病必無反見  
陽脉盛人之脉若只盛大以瀋二陽一陰亦何卒  
急之有哉此亦經所隱而難窺者也



脉訣彙辨卷四

趙郡辰山李延是期叔父輯著

括蒼 劉不拔確菴父叅閱

緊脉 陰中之陽

體象 緊脉有力左右彈人如絞轉索如切緊繩  
緊者細急而兼絞轉之形也多梟動天矯之勢素  
問曰往來有力左右彈人手則剛勁之概可掬  
上病 緊主寒邪亦主諸痛左寸緊者目痛項強緊  
在左關脇肋痛脹左尺緊者腰膝作痛右寸緊者  
鼻塞膈壅緊在右關吐逆傷食右尺得緊奔豚疝

疾

緊爲收斂之象猶天地之有秋冬故主寒邪陽用陰凝故主諸痛

兼脉 浮緊傷寒沉緊傷食急而緊者是謂遁尸數而緊者當主鬼擊

浮緊有力無汗發熱惡寒頭頂痛腰脊強拘急體痛骨節疼此爲傷寒邪在表也獨右關緊盛爲飲食內傷兩手脉俱緊盛卽是夾食傷寒遁尸鬼擊者皆屬陰邪之氣卒中於人邪正交爭安得不急數乎中惡祟乘之脉而得浮緊謂邪方熾而脉無

根也咳嗽虛損之脉而得浮緊謂正已虛而邪方  
痼也咸在不治

按天地肅殺之氣陰凝收斂其見於脉也爲緊較  
之於弦更加挺勁之異仲景曰如轉索無常叔和  
曰數如切繩丹溪曰如糾篋綫譬如以二股三股  
糾合爲繩必旋絞而轉始得緊而成繩可見緊之  
爲義不獨縱有挺急抑且橫有轉側也不然左右  
彈手及轉索諸喻將何所取義乎古稱熱則筋縱  
寒則筋急此惟熱鬱於內而寒束其外崛強不平  
故作是狀緊之與遲雖同主乎寒遲則氣血有虧

乃脉行遲緩而難前緊則寒邪凝襲乃脉行天矯而搏擊須知數而流利則爲滑脉數而有力則爲實脉數而絞轉則爲緊脉形狀畫一不可紊也崔氏但言如線亦窺見梗概第未言之透快耳緊之一字已經古人工於摹寫而僞訣妄曰寥寥入尺來思之幾同寐語夫緊脉猶之行路不惟足高氣揚履聲接踵抑且左右恣意而竟比之一龍鍾衰老舉步不前之態其比擬失倫肆口無忌何至於此庸工猶以爲金針也吁可怪矣

緩脉 陰

體象 緩脉四至來往和勻微風輕颭初春楊柳

緩脉以寬舒和緩爲義與緊脉正相反也故曰緩而和勻不浮不沉不大不小不疾不徐意思欣欣悠悠揚揚難以名狀者此真胃氣脉也

兼脉  
王病

緩爲胃氣不至於病取其著見方可斷證浮

緩傷風沉緩寒濕緩大風虛緩創濕痺緩瀉脾薄緩弱氣虛左寸瀉緩少陰血虛左關浮緩肝風內鼓左尺緩瀉精宮不及右寸浮緩風邪所居右關沉緩土弱濕侵右尺緩細真陽衰極

素問玉機真藏論岐伯曰脾者土也孤藏以灌四旁者也善者不可見惡者可見是故緩脉不主疾病惟考其兼見之脉乃可斷其爲病浮而且緩風上乘也沉而且緩濕下侵也緩而且瀦脾不能統血也緩緩而且細濕痺外乘緩而且瀦脾不能統血也緩而且弱脾不能主氣也

按緩脉在八卦爲坤在五行爲土在時爲四季之末在人身爲足太陰脾若陽寸陰尺上下同等浮大而更無偏勝者和平之脉也故張太素又比之如綵在經不卷其軸應指和緩往來甚勻蓋土爲

萬物之母中氣調和則百疾不生緩之於脉大矣哉

素問玉機真藏論曰其來如水之流者此爲太過病在外如鳥之喙此謂不及病在中太過則令人四肢沈重不舉不及則令人九竅壅塞不通脉經云脾王之時其脉大阿阿而緩名曰平脉反得弦細而長者是肝之乘脾木之剋土爲賊邪死不治反得浮濇而短是肺之乘脾子之扶母爲實邪雖病自愈反得洪大而散者是心之乘脾木之陵土爲微邪雖病卽瘥僞訣以緩脉主脾熱口臭反胃

齒痛夢鬼諸證似乎緩脈王實熱有餘之證杜撰  
如此



芤脉 陽中 陰

體象 芤乃草名絕類葱浮沉俱有中候觸空  
芤草狀與葱無異假令以指候葱浮候之着上面  
之葱皮中候之正當葱中空處沉候之又着下面  
之葱皮

主病 芤狀中空故主失血左寸芤者心王喪血芤  
在左關肝血不藏右尺得芤便利爲咎右寸芤者  
相傳陰亡芤在左關脾血不攝右尺得芤精漏欲  
竭

循行脉外榮行脉中凡失血之病脉中必空故主

證如中

按芤之爲義兩邊俱有中央獨空之象劉三點云  
芤脉何似絕類慈慈指下成窟有邊無中叔和云  
芤脉浮大五軟按之中央空兩邊實二家之言已  
無遺蘊蘇同父云管行脉中脉以血爲形芤脉中  
空脫血之象偽訣云兩頭有中間無以頭字易叔  
和之邊字則是上下之脉割然中斷而成陰絕陽  
絕之診矣又云寸芤積血在胸中關內逢芤腸裏  
難是以芤爲畜血積聚之實脉非失血虛家之空  
脉矣時珍亦祖述其言豈曾未精思耶偽訣又云

將二淋瀝氣人小腸與失血之候有可干涉卽叔和云三部脉芤長病得之生卒病得之死然暴失血者脉多芤而謂卒病得之死可乎其言亦不能無疵也至劉肖齋所引諸家論芤脉者多出附會不可盡信若周菊潭謂生平診脉未有芤象者抑何其言之不審耶虞德恒治一人潮熱微似瘧小腹右邊一塊大如雞卵作痛右腳不能伸縮虞診其脉左寸芤而帶瀼右寸芤而洪實兩尺兩關俱洪數曰此大小腸之間欲作癰耳虞說仍沿偽訣以寸尺和爲表裏耳然芤者中空之象帶瀼猶可

并曰帶洪實實則不荒而荒則不實豈虞之辨證  
乃別有據姑託於豚以明其術耶否則於理亦不  
可解矣

弦脉 陽中之陰

體象 弦如琴弦輕虛而滑端直以長指下挺然  
弦之爲義如琴弦之挺直而略帶長也弦脉與長  
脉皆主春令但弦爲初春之象陽中之陰天氣猶  
寒故如琴弦之端直而挺然稍帶一分之緊急也  
長爲暮春之象純屬於陽絕無寒意故如木幹之  
迢直以長純是發生氣象也

主病 弦爲肝風主痛主瘡主痰主飲左寸弦者頭  
痛心勞弦在左關痰瘧癥瘕左尺得弦飲在下焦  
右寸弦者胸及頭疼弦在右關胃寒膈痛右尺得

弦足舉痼痛

膽爲甲木肝爲乙木自北而東在肝爲厥陰而陰  
盡在膽爲少陽而陽微初春之象逗氣尚少升如  
一縷有弦義焉風屬木而應春弦是其本脉生於  
風則象風故脉自弦弦寒歛束氣不舒暢故又主  
痛瘧之作也邪正交爭或寒而熱熱而寒寒熱往  
來正邪出入樞主於中素問陰陽離合論曰少陽  
爲樞故脉亦當弦飲者痰之類也弦直而歛無鼓  
蕩之力故飲留焉頭乃六陽所聚陽虛不能張大  
或致外邪所乘安得不痛瘧疾寒熱往來常在少

陽經故曰瘡脉自弦又曰無痰不成瘡瘰癧處於其地則邪正不敵小腹沉陰之位受寒乃痛肺家陽氣衰微更受陰寒或右邊頭痛或胸次作疼木來乘土胃寒不化真火不足無以溫煖肝木掣痛之自來也

兼脉 浮弦支飲沉弦懸飲弦數多熱弦遲多寒陽弦頭疼陰弦腹痛單弦飲癖雙弦寒病

飲停在上不在胃而支留於心胸飲停在下不在胃而懸留於腹脇故一弦而浮一弦而沉也數則爲熱弦而兼數者病亦兼熱遲則爲寒弦而兼遲

者病亦兼寒陽弦者寸弦也邪在三陽三陽走頭  
故頭痛陰弦者尺弦也邪在三陰三陰走腹故腹  
痛單弦則止爲陰癰若脉見雙弦已具純陰之象  
若不能食爲木來尅土必不可治

按弦脉在八卦爲震在五行爲木在四時爲春在  
五藏爲肝素問玉機真藏論曰春脉肝也東方木  
也萬物之所以始生也故其氣來與弱輕虛而滑  
端直以長故曰弦反此者病其氣來而實強此爲  
太過病在外其氣來不實而微此爲不及病在中  
太過則令人善怒忽忽眩冒而顛疾不及則令人



胸脇痛引背兩脇脹滿素問平人氣象論曰平肝  
脉來更弱超超如揭長竿末稍曰肝平春以胃氣  
爲本肝脉來盈實而滑如循長竿曰肝病死肝脉  
來急益勁如新張弓弦曰肝死戴同父云弦而更  
其病輕弦而硬其病重深契內經之旨素問玉機  
真藏論篇云端直以長叔和云如張弓弦巢氏云  
按之不移察察如按琴瑟弦戴同父云從中直過  
挺然指下諸家之論弦脉可謂深切著明而僞訣  
乃言時時帶數又言脉緊狀繩牽則是緊脉之象  
安在其弦脉之義哉弦亦謂其主候然以飲較痰

尚未結聚所以弦不似滑之累累替替之有物形也

革脉 陽中之陰

體象 革大弦急浮取卽得按之乃空渾如鼓革  
恰如鼓皮外則綳急內則空虛也故浮取於鼓面  
而已卽得若按之則虛而無物矣

主病 革主表寒亦屬中虛左寸革者心血虛痛革  
在左關疝瘕爲祟左尺得革精空可必右寸革者  
金衰氣壅革在右關上虛而疼右尺得革殞命爲  
憂女人得之半產漏下

脉如皮革表邪有餘而內則不足惟表有寒邪故  
弦急之象先焉惟中虧氣血故空虛之象顯焉男

人諸病多由精血不足之故。女人半產漏下者，亦以血驟去，故脉則空也。

按革者，皮革之象也。浮舉之而弦急，非綱急之象。平沉按之而豁然，非中空之象。平仲景曰：脉弦而大，弦則爲減，大則爲芤。減則爲寒，芤則爲虛。虛寒相搏，此名爲革。此節正革脉之註脚也。革如皮革急滿，指下今云脉弦而大，只此四字可以盡革脉之形狀矣。弦則爲減，以下又發明所以爲革之義也。叔和云：三部脉革，長病得之死，新病得之生。時珍云：此芤弦二脉相合，故爲亡精失血之候。諸家

脉書皆以爲卽半脉也故或有革無半或有半無  
革混淆莫辨不知革浮半沉革虛牢實形與證皆  
異也甲乙經曰渾渾革革至如涌泉病進而色黃  
漿綿綿其去如弦絕者死謂脉來渾濁革變急如  
泉涌出而不返也觀其曰湧泉則浮取之不止於  
絃大而且數且搏且滑矣曰弦絕則重按之不止  
於絃然而且絕無根蒂矣故曰死也王貺以爲溢  
脉者因甲乙經有湧泉之語而附會其說也不知  
溢脉者自寸而上貫於魚際直冲而上如水之沸  
而盈溢也與革脉奚涉乎丹溪曰如按鼓皮其於

中空外急之義最爲切喻伯仁以革爲變革之義  
誤矣若曰變革是怪脉也而革果怪脉乎則變革  
之義何居耶

牢脉 陰中之陽

體象 牢在沉分大而弦實浮中二候了不可得  
深居在內之象也故樹本以根深爲牢蓋深入於  
下者也監獄以禁囚爲牢深藏於內者也仲景曰  
寒則牢固又有堅固之義也

主病 牢主堅積病在乎內左寸牢者伏梁爲病牢  
在左關肝家血積左尺得牢奔豚爲患右寸牢者  
息賁可定牢在右關陰寒痞癰右尺得牢疝瘕痛  
甚

牢脉所主之證以其在沉分也故悉屬陰寒以其

形弦實也故成爲堅積積之成也正氣不足而邪氣深入牢固心之積名曰伏梁肝之積名曰肥氣腎之積名曰奔豚肺之積名曰息賁脾之積名曰痞痞氣及一切按之應手者曰癥假物成形者曰瘕見於肌肉間者曰痞結於隱癖者曰癖經曰積之始生得寒乃生厥乃成積故牢脉咸主之若夫失血亡精之人則內虛而當得革脉乃爲正象若反得牢脉是脉與證反可以卜短期矣

按沈氏曰似沉似伏牢之位也實大弦長牢之體也牢脉不可混於沉脉伏脉須細辨耳沉脉如綿



裹砂內剛外柔然不必兼大絃也伏脉非推筋至  
骨不見其形在於牢脉旣實大纔重按之便滿指  
有力以此爲別耳叔和云似沉似伏猶不能作畫  
一之論也吳草廬曰牢爲寒實革爲虛寒安可混  
乎僞訣云尋之則無按之則有但依稀彷彿那不  
言實大弦長之形象是沉脉而非牢脉矣又曰脉  
入皮膚辨息難更以牢爲死亾之脉其謬可勝數  
哉

濡脉 陰中之陰

體象 濡脉細軟見於浮分舉之乃見按之卽空  
濡者卽軟之象也必在浮候見其細軟若中候沉  
候不可得而見也叔和比之帛浮水面時珍比之  
水上浮漚皆狀其隨手而沒之象也

主病 濡主陰虛。髓竭精傷。左寸濡者健忘驚悸。濡  
在左關血不榮筋。左尺得濡精血枯損。右寸濡者  
腠虛自汗。濡在右關脾虛濕侵。右尺得濡火敗命  
垂。

按浮主氣分浮取之而可得氣猶未敗沉主血分

沉按之而如無此精血衰敗在久病老年之人。尚  
未至於必絕。爲其脉與證合也。若平人及少壯及  
暴病見之。名爲無根之脉。去死不遠。叔和言輕手  
相得按之無有。僞訣反言按之似有。舉之無悸。戾  
一至此耶。且按之則似有。舉之則還無。是弱脉而  
非濡脉矣。濡脉之浮軟與虛脉相類。但虛脉形大  
而濡脉形小也。濡脉之細小與弱脉相類。但弱在  
沉分而濡在浮分也。濡脉之無根與散脉相類。但  
散脉從浮大而漸至於沉。濡脉從浮小而漸至於  
不見也。從大而至沉者。全內從小而之無者。爲吉。

凶相半也又主四體骨蒸蓋因腎氣衰絕水不勝  
火耳

弱脉 陰

體象 弱脉細小見於沉分舉之則無按之乃得沉而且細且小體不充勢不鼓也

王病 弱爲陽膈真氣衰弱左寸弱者驚悸健忘弱在左關木枯攀急左尺得弱涸流可徵右寸弱者自汗短氣弱在右關水穀之病右尺得弱陽脂可驗

夫浮以候陽陽主氣分浮取之而如無則陽氣衰微確然可據夫陽氣者所以衛外而爲固者也亦以運行三焦熟腐五穀者也柳氏曰氣虛則脉弱

寸弱陽虛尺弱陰虛關弱胃虛弱脉呈形而陰靈已極自非見魄而陽何以復耶素問玉機真藏論曰脉弱以滑是有胃氣脉弱以濇是爲久病愚謂弱堪重按陰猶未絕若兼濇象則氣血交敗生理滅絕矣仲景云陽陷入陰當惡寒發熱久病及衰年見之猶可維援新病及少壯得之不死安待按脉經曰弱脉極軟而沉細按之乃得舉手無有何其彰明詳盡也僞訣爲輕手而得明與叔和相反且是濡脉之形而非弱脉之象因知僞訣悞以濡脉爲弱弱脉爲濡其內莽特甚卽黎氏浮瀼之

管亦踵高陽之弊不可不詳加考據也

散脉 陰

體象 散脉浮亂有表無裏中候漸空按則絕矣  
白有漸無之象亦散亂不整之象也當尋候之儼  
然大而成其爲脉也及中候之頓覺無力而減其  
十之七八矣至沉候之杳然不可得而見矣

主病 散爲本傷見則危殆左寸散者怔忡不卧散  
在左關常有濫飲左尺得散北方水竭左寸散者  
自汗淋漓散在右關脹滿壅壞右尺得散陽消命  
絕

按漸重漸無漸輕漸有明乎此八字而散字之象



恍然矣故叔和云散脉大而散有表無裏字字斟酌崔氏云渙漫不收蓋渙漫卽浮大之義而不收卽無根之義雖得其大意而未能言之鑿鑿也柳氏云無統紀無拘束至數不齊或來多去少或去多來少渙散不收如楊花散漫之象夫楊花散漫卽輕飄而無根之說也其言至數不齊多少不一則散亂而不能整齊嚴肅之象也此又補叔和未備之旨深得散脉之神者也戴同父云心脉浮大而散肺脉短濇而散皆平脉也心脉與散爲怔忡肺脉與散爲汗出肝脉與散爲溢飲脾脉與散爲

肝腫皆病脉也。腎脉軟散諸病脉代散皆死脉也。  
古人以代散爲必死者。蓋散爲腎敗之徵。代爲脾  
絕之徵也。腎脉木而散。脾脉土信而代。脉軟至不  
天資始之根。和絕也。脾脉主信而代。脉軟至不  
其期是後天資生之根。木絕也。故二脉獨見均爲  
危殆之候。而二脉交見尤爲必死之符。

細脉 陰

體象 細直而軟累累綦綦狀如絲線較顯於微

小也細也狀如絲也比之於微指下猶尚易見未  
至於舉按模糊也

主病 細主氣衰諸虛勞損左寸細者怔忡不寐細  
在左關肝血枯竭左尺得細洩痢遺精右寸細者  
嘔吐氣怯細在右關胃虛脹滿右尺得細下元冷  
憊

細脉微脉俱爲陽氣衰殘之候夫氣主煦之非行  
溫補何以復其散失之元乎常見虛損之人脉已

細而身常熱醫者不究其元而以涼劑投之何異  
於惡醉而強酒遂使真陽散敗飲食不進上脘下  
泄是速之使斃耳素問陰陽別論云壯火食氣少  
火生氣人非少火無以運行三焦熟腐五穀未徹  
乎此者安足以操司命之權哉然虛勞之脉細數  
不可並見並見者必死細則氣衰數則血敗氣血  
交窮短期將至叔和云細爲血少亦主氣衰有此  
證則順無此證則逆故吐利失血得沉細者生憂  
勞過度之人脉亦多細爲自戕其氣血也春夏之  
令少壯之人俱忌細脉謂其不與時合不與形合

也秋冬之際老弱之人不在禁忌之例

按絲之質最柔絲之形最細故以形容細脉王啟  
立曰狀如莠蓬正於柔細之態善摩巧擬恍在目  
前僞訣失其柔軟之意而但云極細則可移于微  
脉而豈能獨標細脉之體象乎微細二脉或有單  
指陽衰或有單指陰竭或有兼陰陽而主病則非  
畫一之論矣大都浮而細者屬之陽分則見自汗  
氣急等証沉而細者屬之陰分則見下血血痛等  
証

伏脉陰

體象 伏爲隱伏更下於沉推筋着骨始得其形

伏之爲義隱伏而不見之謂也浮中二候絕無影響雖至沉候亦不可見必推筋至骨方始得見耳  
主病 伏脉爲陰。受病人深。左寸伏者血鬱之愆伏在左關肝血在腹左尺得伏痛瘕可驗右寸伏者氣鬱之殃伏在右關寒凝水穀右尺得伏少火消  
人

其主病多在沉陰之分隱深之地非輕淺之劑所能破其藩垣也諸證莫非氣血結滯惟右關右尺

責其無火蓋火性炎上推筋至骨而形始見積衰可知更須以有力無力細爲分辨則伏中之虛實燎然矣

按傷寒論中以一手脉伏爲單伏兩手脉伏曰雙伏不可以陽證見陰脉爲例也火邪內鬱不得發越乃陽極似陰故脉伏者必有大汗而解正如久旱將雨必先六合陰晦一回雨後庶物咸蘇也又有陰證傷寒先有伏陰在內而外復感冒寒邪陰氣壯盛陽氣衰微四肢厥逆六脉沉伏須投薑附及灸關元陽乃復回脉乃復出也若太谿衝陽皆

無脉者則必死無疑劉玄賓云伏脉不可發汗爲  
其非表脉也亦爲其將自有汗也乃僞訣云徐徐  
發汗而潔古欲以附子細辛麻黃湯發之皆非伏  
脉所宜也僞訣論形象則妄曰尋之似有定息全  
無是於中候見形矣於伏之名義何居乎



動脈

體象 動無頭尾其形如豆厥厥動搖必兼滑數  
動脈厥厥動搖急數有力兩頭俯下中間突起極  
與短脈相類但短脈爲陰不數不硬不滑也動脈  
爲陽且數且硬且滑也

主病 動脈主痛亦主于驚左寸動者驚悸可斷動  
在左關驚及拘攣左尺得動亡精失血右寸動者  
自汗無疑動在右關心脾疼痛右尺得動龍火奮  
迅

陰陽不和氣轉擊則痛氣撓逆則驚動居左寸心

王受侮驚悸至矣肝膽同居肝主筋而膽主震定  
動則皆病人之根蒂在尺動則陽不能衛陰不能  
守亡精失血可立而待肺家主氣動則外衛不密  
汗因之泄陰陽相搏心脾不安動乃痛作右尺真  
陽潛伏之所而亦見動象則陽氣不得蟄藏必有  
非時奮迅之患

按關前爲陽關後爲陰故仲景云陽動則汗出分  
明指左寸之心汗爲心之液右寸之肺肺主皮毛而  
司腠理故汗出也又曰陰動則發熱分明指左尺  
見動爲腎水不足右尺見動謂相火虛炎故發熱

也因是而知舊說言動脉只見於關上者非也且  
素問曰婦人手少陰心脉動甚者爲妊子也然則  
手少陰明謀於左寸矣而謂獨見於關可乎成無  
已曰陰陽相搏而虛者動故陽虛則陽動陰虛則  
陰動以關前爲陽主汗出關後爲陰主發熱豈不  
精矣而龐安常強爲之說云關前三分爲陽關後  
二分爲陰正當關位半陰半陽故動隨虛見是亦  
泥動脉只見於關之說也僞訣云尋之似有舉之  
還無是弱脉而非動脉矣又曰不離其處不往不  
來三關沉沉含糊謬妄無一字與動脉合義矣啓

氏曰如鈎如毛則混於浮大之脉尤堪捧腹王宇  
泰曰陽生陰降二者交通上下往來於尺寸之內  
方且冲和安靜焉觀所謂動者哉惟夫陽欲降而  
陰逆之陰欲升而陽逆之兩者相搏不得上下擊  
鼓之勢隴然高起而動脉之形著矣此言不啻與  
動脉寫照

促脉

陽

體象 促爲急促數時一止如趨而蹶進則必死  
促之爲義於急促之中時見一歇止爲陽盛之象  
也黎氏曰如蹶之趣徐疾不常深得其義叔和云  
促脉來去數時一止復來亦頗明快

主病 促因火亢亦因物停左寸促者心火炎炎促  
在左關血滯爲殃左尺得促遺滑堪憂右寸促者  
肺鳴咯咯促在右關脾宮食滯右尺得促灼熱爲  
定

按人身之氣血貫注於經脉之間者刻刻流行綿

卷四

三

綿不息。凡一晝夜當五十營。不應數者名曰狂生。其應於脉之至數者。如鼓應桴。罔或有忒也。臟氣乖違。則稽留凝泣。阻其運行之機。因而歇止者。其上爲輕。若真元衰憊。則陽弛陰澌。失其揆度之常。因而歇止者。其止爲重。然促脉之故。得于臟氣乖違者。十之六七。得于真元衰憊者。十之二三。或因氣滯。或因血凝。或因痰停。或因食壅。或外因六氣。或內因七情。皆能阻遏其運行之機。故雖當往來急數之時。忽見一止耳。如止數漸稀。則爲病瘥。止數漸增。則爲病劇。所見諸症。不出血凝氣滯。更當

與他脉相參耳。促脉隨病呈形。偽訣但言併居寸口已非促脉之義。且不言時止。猶爲贗贗矣。

結脉 陰

體象 結爲凝結緩時一止徐行而怠頗得其旨

結而不散遲滯中時見一止也古人譬諸徐行而怠偶驕一步可爲結脉傳神

主病 結屬陰寒亦由凝積左寸結者心寒疼痛結在左關痛瘕必現左尺得結痿躄之病右寸結者肺虛氣寒結在右關痰滯食停右尺得結陰寒爲楚

熱則流行寒則停凝理勢然也夫陰寒之中且挾凝結喻如隆冬天氣嚴肅流水冰堅也少火衰弱



中氣虛寒失其乾健之運則血氣痰食互相糾纏  
浮結者外有痛積伏結者內有積聚故知結而和  
加者方爲積聚而無加者是真氣衰弱違其運化  
之常惟一味溫補爲正治越人云結甚則積甚結  
微則氣微是知又當以止歇之多寡而斷病之重  
輕也

按運行之機絨不利則脉應之而成結仲景云纍  
纍如循長竿曰陰結藹藹如車蓋曰陽結叔和云  
如麻子動搖旋引旋收聚散不常爲結則結之體  
狀有非淺人所領會也夫是三者雖同名爲結而

義實有別浮分得之爲陽結而沉分得之爲陰結止  
數頻多參伍不調爲不治之症山斯測之結之主  
症未可以一端盡也僞訣云或來或去聚而却還  
律以緩時一止之義全無怕涉豈欲彷彿叔和  
引旋收之狀而詞不達意乎此著述之所以不可  
易易也

代脉 陰

體象 代爲禪代止有常數不能自還良久復動  
代亦歇止之脉但促結之止內有所礙雖止而不  
全斷中有還意代則止而不還良久復止如四時  
之禪代不愆其期也又結促之止止無常數代脉  
之止止有定期

主病 代主藏衰危惡之候脾土敗壞吐利爲咎中  
寒不食腹疼難救

止有定期者蓋脾主信也故內經以代脉一見爲  
藏氣衰微脾氣脫絕之診

按代脉之義自各不同如素問宣明五氣篇曰脾脉代邪氣藏府病形篇曰黃者其脉代皆言藏氣之常候非謂代爲止也素問平人氣象論曰長夏胃微溼弱曰平但代無胃曰死者蓋言無胃氣而死亦非以代爲止也若脾王四季而隨時更代者乃氣候之代卽宣明五氣等篇所云者是也若脉平勻而忽強忽弱者乃形體之代卽宣明五氣等篇所云者是也脉無定候更變不常則均爲之代須因變察情如云五十動而不一代者是乃至數之代大抵脉來一息五至則肺心脾肝腎五藏之

氣皆足故五十動而不一止合大衍之數謂之平  
脉反此則止乃見焉腎氣不能至則四十動一止  
肝氣不能至則三十動一止至脾氣不能至則二  
十動一止至心氣不能至則十動一止至肺氣不  
能至則四五動一止至當自遠而近以次而短則  
由腎及肝由肝及脾由脾及心由心及肺故凡病  
將死者必氣促以喘僅呼于胸中數寸之間此時  
真陰絕于下孤陽浮於上氣短已極醫者猶欲平  
之散之未有不隨撲而滅者戴同父云三部九候  
候必滿五十動出自難經而偽訣五藏歌中皆以

四十五動準乖於經旨又云四十一止一藏絕却  
後四年多命沒荒耗尤甚夫人豈有一藏既絕尚  
活四年叔和亦曰脉來四十動而一止者一藏無  
氣却後四歲春草生而死未知靈樞根結篇但言  
動止之數以診五藏無氣之候何當鑒言死期耶  
滑伯仁曰無病而羸瘦脉代者危候也有病而氣  
血乍損根爲病脉此伯仁爲暴病者言也若久病  
而得代脉與其回春萬不得一矣

傷寒心悸有中氣虛者管仲者汗下後者中氣虛  
則陽陷陽受氣于胸中陽氣陷則不能上充於胸

中故悸停飲者飲水多而停於心下也水停心下  
水氣上凌心不自安故悸汗後則裏虛矣況汗乃  
心液心液耗則心虛心虛故悸諸悸者未必皆脉  
代若脉代者正指汗後之悸以汗爲心液脉爲心  
之合耳女胎十月而產府藏各輸真氣資次培養  
若至期當養之經虛實不調則胎孕爲之不安甚  
則下血而墮矣當三月之時心包絡養胎靈樞經  
脉篇云心包主脉若分氣及胎脉必虛代在靈樞  
五藏生成篇曰心合脉蓋心與心胞雖分二經原  
屬一藏故耳代脉主病但標脾藏虛衰而不及他

症故附列焉



疾脉 陽

體象 疾爲疾急數之至極七至八至脉流薄疾六至以上脉有兩稱或名曰疾或名曰極總是急速之形數之甚者也

王病 疾爲陽極陰氣欲竭脉號離經虛魂將絕漸進漸疾旦夕殞滅毋論寸尺短期已決

陰陽相等脉至停均若脉來過數而至於疾有陽無陰其何以生是惟傷寒熱極方見此脉非他疾所恒有也若癆瘵虛憊之人亦或見之則陰髓下竭陽光上亢可與之夾短期矣陰陽易病者脉常

七八至號爲離經是已登鬼錄者也至夫孕婦將產亦得離經之脉此又非以七八至得名如昨浮今沉昨大今小昨遲今數昨滑今澀但離於平素經常之脉卽名爲離經矣心肺諸竅總之眞陰消竭之兆譬如繁絃急管樂作將終烈焰騰空薪傳欲盡夫一息四至則一晝一夜約一萬三千五百息通計之當五十周於身而脉行八百一十丈此人身經脉流行之常度也若一息八至則一日一夜周於一身者當一百營而脉遂行一千六百餘丈矣必至喘促聲嘶僅呼吸於胸中數寸之間而

不能達於根蒂真陰極於下孤陽亢於上而氣之  
短已極矣夫人之生死由於氣氣之聚散在乎血  
凡殘喘之尚延者祇憑此一綫之氣未絕耳一息  
入至之候則氣已欲脫而猶冀以草木生之何怪  
其不相及也